



Stručna služba općinskog vijeća i općinskog načelnika

Broj: 01/1-02-1790/19  
Ilijaš, 30.08.2019. godine

PRIJEDLOG

**Z A P I S N I K**

sa 33. (tridesettreće) sjednice Općinskog vijeća Ilijaš, održane dana 30.08.2019. godine, sa početkom u 10:00h.

Tridesettrećom sjednicom Općinskog vijeća Ilijaš predsjedavala je predsjedavajuća Općinskog vijeća Ilijaš g-đa Alma Omerović.

Prisutni vijećnici:

RB.	IME I PREZIME
	SDA
1	ŠEHERZADA ĆOSIĆ
2	ANEL BUMBULOVIĆ
3	VEHID HALILOVIĆ
4	ALMA OMEROVIĆ
5	-
6	ADEM ALIĆ
7	FAHIR HASANOVIĆ
8	MIRZA BEKTIĆ
9	-
10	HALID DIZDAREVIĆ
11	RASIM ŠEHIĆ
12	MELISA MATORUGA
13	ALEN HASKOVIĆ
14	-
	SDP
15	ALAN ŠERAK
16	ELDAR ŠEHIĆ
17	MIRSAD OSMANOVIĆ
	SBB-FAHRUDIN RADONČIĆ
18	AKIF BEŠLIJA
	BPS-SEFER HALILOVIĆ
19	MUHAMED HANDŽIĆ
20	ALMIR ŠPIODIĆ
	GS
21	EDHEM HASANOVIĆ
22	ASIM MUJIĆ
	SAMOSTALNI VIJEĆNICI
23	-
24	-
	LDS
25	MEHO DŽINDO

Odsutni vijećnici:

1. Mehmed Sinanović
2. Semir Dedić
3. Sead Šehić
4. Semir Dizdarević i
5. Besim Gljiva

Prisutni gosti:

1. TV Vogošća
2. Radio Ilijaš – Aida Kevrić-Muratović
3. Maida Šuško-Gluho – zamjenica pravobranioca Pravobranilaštva Kantona Sarajevo
4. Samir Termiz – zamjenik pravobranioca Pravobranilaštva Kantona Sarajevo
5. Mehmed Smajlović – predsjednik savjeta MZ Mrakovo
6. Volonter: Nedim Balta

Ostali prisutni:

1. Akif Fazlić – općinski načelnik
2. Merima Osmanović – pomoćnik načelnika
3. Sadeta Brkić – pomoćnik načelnika
4. Nijaz Spahić – pomoćnik načelnika
5. Zdravko Barić – pomoćnik načelnika
6. Aziz Fazlić – pomoćnik načelnika
7. Sanja Zagorac-Jozić – pomoćnik načelnika
8. Ilda Kahriman – sekretar OV-a Ilijaš
9. Mersa Zeković - šef Odsjeka za prostorno planiranje i zaštitu okoliša
10. Meho Gljiva - Služba za društvene djelatnosti i poslove mjesnih zajednica
11. Adha Masnopita – stručni savjetnik za stambeno-komunalne poslove
12. Nermina Lemezan - stručni saradnik za informacije
13. Maida Habibović – zapisničar.

ALMA OMEROVIĆ – predsjedavajuća

Prije nego je otvorila sjednicu, predsjedavajuća je napomenula da se u Ilijašu obilježava Međunarodni dan nestalih, te u vezi s tim u 10:50h planirana je pauza kada ćemo izaći na Trg Alije Izetbegovića gdje je planirano obilježavanje ovog dana i tako iskazati svoj podršku ovom Udruženju i poslati jasnu poruku svojim dolaskom.

Otvorila 33. sjednicu Općinskog vijeća i konstatovala da je prisutno 20 vijećnika, te da postoji kvorum za odlučivanje.

Zatim je dala na razmatranje zapisnik sa 32. sjednice OV-a.

Primjedbi na zapisnik nije bilo, pa je OV-e jednoglasno usvojilo zapisnik sa 32. sjednice OV-a.

Pročitala je dnevni red i dala na razmatranje.

AKIF FAZLIĆ – općinski načelnik

Kao predlagač, povukao je sljedeće tačke dnevnog reda: 8. Prijedlog Odluke o dopuni Odluke o pristupanju izradi izmjena i dopuna Regulacionog plana "Banovac", 9. Prijedlog Odluke o dopuni Odluke o pristupanju izradi izmjena i dopuna Regulacionog plana

"Podlugovi" za lokalitet "1" i "2" i 12. Prijedlog Odluke o gubitku statusa javnog dobra u općoj upotrebi shodno stavovima Komisije za statut i propise i Službe za imovinsko-pravne poslove.

Zatim je predložio da se tačka 1. Vijećnička pitanja i inicijative podnesu pismeno ili da to bude zadnja tačka dnevnog reda kako bi Izvještaj o radu Pravobranilaštva došao na dnevni red prije ove pauze koja je planirana.

ELDAR ŠEHIĆ – vijećnik SDP-a

Ako je moguće da vijećnička pitanja i inicijative ne bude zadnja tačka dnevnog reda zato što smo svjedoci da je na prošloj sjednici tako bilo i da su svi izašli prije te tačke dnevnog reda.

ALMA OMEROVIĆ – predsjedavajuća

Nije bitno koja će to tačka biti na dnevnom redu, samo da stignemo na ovu planiranu pauzu, a imamo i goste iz Pravobranilaštva Kantona Sarajevo.

ELDAR ŠEHIĆ – vijećnik SDP-a

Postoji li mogućnost da tačka 3. bude tačka 1.?

ALAN ŠERAK – vijećnik SDP-a

Predlažem da tačka Vijećnička pitanja i inicijative bude pod tačkom 2. a Izvještaj o radu Pravobranilaštva Kantona Sarajevo ili eventualno da Vijećnička pitanja inicijative prebacimo kao zadnju tačku dnevnog reda.

Obzirom da diskutanata po dnevnom redu više nije bilo, Općinsko vijeće je jednoglasno usvojilo sljedeći

#### DNEVNI RED

1. Izvještaj o radu Pravobranilaštva Kantona Sarajevo u zastupanju Općine Ilijaš za period od 01.01.2018. do 31.12.2018. godine
2. Izvještaj o realizaciji zaključaka sa 32. sjednice
3. Izvještaj o izvršenju Budžeta općine Ilijaš za period 01.01.2019-30.06.2019. godine
4. Prijedlog Izmjena i dopuna Budžeta općine Ilijaš za 2019. godinu
5. Prijedlog Odluke o davanju mišljenja na Godišnji plan realizacije šumsko privredne osnove za privatne šume na području Općine Ilijaš
6. Prijedlog Odluke o davanju saglasnosti na plan utroška namjenskih sredstava prikupljenih po osnovu naknade za korištenje državnih šuma
7. Prijedlog Odluke o pristupanju izradi plana parcelacije "Apartmansko naselje Alain" Ljubnići
8. Prijedlog Odluke o davanju saglasnosti za raskid ugovora
9. Prijedlog Odluke o načinu i uslovima prodaje neizgrađenog građevinskog zemljišta (k.č.br.1039/3)
10. Prijedlog Rješenja iz imovinsko-pravne oblasti, broj: 06/1-31-3734/18 od 26.06.2019. godine
11. Informacija o stanju sigurnosti na području Općine Ilijaš za proteklih šest mjeseci 2019. godine

## 12. Vijećnička pitanja i inicijative

AD-1

Izveštaj o radu Pravobranilaštva Kantona Sarajevo u zastupanju Općine Ilijaš  
za period od 01.01.2018. do 31.12.2018. godine

MAIDA ŠUŠKO-GLUHO - zamjenica pravobranioca

Pravobranilaštvo preduzima mjere i pravna sredstva radi pravne zaštite imovine i imovinskih interesa Općine Ilijaš koja je svojom Odlukom povjerila pravobranilačke poslove ovom Pravobranilaštvu, pred sudovima u parničnim, vanparničnim, izvršnim, stečajnim, likvidacionim postupcima, kao i drugim postupcima pred drugim nadležnim organima. Funkcija Pravobranilaštva ogleda se u pogledu pravne zaštite imovine i imovinskih interesa Općine Ilijaš kako je to navedeno u Izveštaju.

U tabelarnom prikazu na strani 2. Izveštaja prikazano je koliko je parničnih, izvršnih, upravnih, vanparničnih postupaka, mišljenja i upravnih sporova pokrenuto.

Parnični postupci su postupci koji zauzimaju najznačajnije mjesto kada je u pitanju zastupanje pravnih interesa.

Po vrsti i predmetu spora, najveći broj postupaka odnosi se na predmete po osnovu naknade šteta, sporovi radi utvrđivanja prava vlasništva, sporovi obligaciono pravne prirode, stambeni sporovi, radni sporovi i sporovi iz ostalih odnosa.

Kao i prethodnih godina i ove godine izdvojili smo parnice koje su značajne za uspjeh i odbranu Pravobranilaštva u zastupanju imovinsko-pravnih interesa. Jedna od takvih je bila po tužbi Džafo Hamdo i drugi protiv Općine Ilijaš utvrđivanje prava vlasništva dosjelošću. Predmetni spor je karakterističan iz razloga jer se radi o zemljištu na kojem je upisan erar-općenarodna imovina. Zemljište se nalazi na teritoriji Općine Ilijaš i riječ je o 46.569 m<sup>2</sup>, dakle blizu 47 dunuma zemlje koja uključuje kuće 4 tužitelja, prateće objekte, dvorišta, mezaruluke i velike obradive i neobradive površine zemlje.

Predmet se trenutno po žalbi nalazi na Kantonalnom sudu u Sarajevu, Pravobranilaštvo je blagovremeno dostavilo Sudu odgovor na žalbu.

Slična parnica je bila tužba Macanović Gruje protiv Općine Ilijaš radi utvrđivanja prava vlasništva dosjelošću. Ovaj predmet se nalazi u fazi zakazivanja ročišta. Dakle, nemamo još donešenu odluku.

Parnica po tužbi Hasić Sejdalije protiv Općine Ilijaš radi naknade štete. Tužitelje je tužbenim zahtjevom potraživao iznos od 35.040,00 KM zbog troškova na pretvaravanju stambenog u poslovni prostor, te iznos od 11.992,00 KM zbog troškova vraćanja namjene prostora iz poslovnog u stambeni. Prvostepeni sud donosi Odluku kojom usvaja jedan dio tužbenog zahtjeva, drugi dio odbija. Međutim, uz adekvatnu argumentaciju, saradnju sa vašim pomoćnicima u općini, Kantonalni Sud je, a naša žalba je bila jako kvalitetna, žalbu u cjelosti usvojio. Dakle, potvrdio je dio da tužitelju ne pripada naknada štete apsolutno nikako. Takva Odluka je obavezala tužitelja Hasić Sejdaliju na troškove postupka 2.576,00 KM gdje je Pravobranilaštvo u izvršnom postupku podnijelo prijedlog i ti troškovi su u fazi naplate. Tužitelj je na navedenu presudu uložio Reviziju Vrhovnom sudu Federacije BiH na koju je ovo Pravobranilaštvo dalo iscrpan odgovor.

Specifično je da je osnov za naplatu štete bilo Rješenje organa uprave, pa kako je ovakva Odluka jako dobra i povoljna za interes općine Ilijaš, cijenimo da je i najveća sudska instanca potvrdila da su organi uprave donijeli sasvim zakonito i dobro Rješenje.

Jedna od sljedećih parnica koje smo naveli je parnica Samardžić Džemala protiv tužene općine Ilijaš. Tužitelj traži da tuženi za zamjenu za porušenu garsonjeru u Ilijašu obezbijedi stan sa pravom otkupa po Zakonu o prodaji stanova na kojima postoji stanarsko pravo ili

da mu se isplati protuvrijednost u iznosu od 20.000,00 KM materijalne štete. Ovaj predmet je zaključen u mjesecu julu tekuće godine, a radi korištenje godišnjih odmora presuda još nije donešena.

Kada su u pitanju izvršenja, tokom 2018. godine evidentiran su 22 izvršna predmeta, od kojih je u 2018. godini zaprimljeno 2, a iz ranijih godina je preneseno 20 predmeta. Od 22 predmeta, okončano je 3, a u radu je ostalo 19 predmeta čiji su postupci u toku. Oni koji su značajni su izvršni postupci protiv Hodžić Asmine, Udobnost d.o.o. Sarajevo, Kolašinac Faruk, Hamza Alija.

ALMA OMEROVIĆ – predsjedavajuća

Konstatujem da je OV-e jednoglasno usvojilo

Izveštaj o radu Pravobranilaštva Kantona Sarajevo u zastupanju Općine Ilijaš  
za period od 01.01.2018. do 31.12.2018. godine

MAIDA ŠUŠKO-GLUHO - zamjenica pravobranioca

Na kraju, iskoristit ću priliku da vam se obratim sa jednom molbom i sugestijom. Naime, prethodni Izveštaj o radu usvojen je jednoglasno, a evo i ovaj, što će reći da su naši interesi i naša saradnja na obostrano zadovoljstvo dobra i ona treba u budućnosti da bude nastavljena. S tim u vezi, dužna sam vas informisati da Ugovor koji imamo zaključen u pogledu zastupanja na mjesečnom nivou iznosi 2000,00 KM. Naši troškovi zastupanja kada je u pitanju zastupanje općine, prelaze iznos 3.500,00 KM. Ovaj Ugovor je na snazi do 31.12.2019. godine. U tom smislu, molimo vas da imate sluha i podržite naš zahtjev za povećanje sredstava koji je itekako opravdan, a naročito imajući u vidu da su 2016. godine donesene izmjene i dopune Zakona o Pravobranilaštvu koje su predviđjele da Pravobranilaštvo, kao i advokati, imaju pravo na troškove prilikom zastupanja u parničnim i drugim predmetima.

AKIF FAZLIĆ – općinski načelnik

Ovaj Izveštaj je usvojen, ali zaista imam potrebu da kažem par riječi. Prije svega želim da iskažem svoj pozitivan stav vezano za saradnju i odnos organa općine Ilijaš sa Pravobranilaštvom Kantona Sarajevo. Pogotovo se to odnosi na period u zadnjih nekoliko godina od dolaska trenutnog pravobranioca Kemala Karića i ljudi koji su evo danas ovdje sa nama, očito sa kadrovski ojačanim Pravobranilaštvom. Vi znate moje mišljenje. Gotovo sve općine su uvele svoja opštinska Pravobranilaštva, a ja i dalje imam stav da je Kantonalno Pravobranilaštvo sigurno najkompetentnije Pravobranilaštvo kada je u pitanju struka i zastupanje i dalje držim do toga ako nas iko može kompetentnije zastupati da to jeste Kantonalno Pravobranilaštvo i ova inicijativa koja je došla iz Pravobranilaštva sigurno ćemo je razmatrati u januaru kada budemo donosili novu Odluku. Mislim da će ona naići na podršku, naravno uz uslove ovako dobre saradnje, još veće saradnje i naravno puno je tu posla i mislim da ovaj posao dobro radimo.

AD-2

Izveštaj o realizaciji zaključaka sa 32. sjednice

ALMA OMEROVIĆ – predsjedavajuća

Konstatovala je da na 31. sjednici OV-a nije bilo Zaključaka.

Općinsko vijeće je jednoglasno usvojilo

Izveštaj o realizaciji zaključaka sa 32. sjednice

AD-3

Izveštaj o izvršenju Budžeta općine Ilijaš za period 01.01.2019-30.06.2019. godine

Diskutanata po ovoj tački dnevnog reda nije bilo, pa je OV-e jednoglasno usvojilo

Izveštaj o izvršenju Budžeta općine Ilijaš za period 01.01.2019-30.06.2019. godine

AD-4

Prijedlog Izmjena i dopuna Budžeta općine Ilijaš za 2019. godinu

AKIF FAZLIĆ – općinski načelnik

Vidjeli ste da je Izmjenama i dopunama zadržan Budžet kojeg smo donijeli u decembru prošle godine, a ovaj simboličan porast je samo plod matematičkih radnji, nije ništa drugo, ali ono što u sebi ove Izmjene donose jeste da imamo određene promjene u strukturi tog Budžeta. Te Izmjene u strukturi Budžeta su i na prihodovnoj i na rashodovnoj strani. Tako da ću samo kratko naglasiti da evo imamo određena povećanja kada se tiče prihoda indirektnog oporezivanja koje proizilaze iz akciza koje su uvedene na cijenu nafte i naftnih derivata. Uvođenjem tih akciza donesen je i Pravilnik o raspodjeli tih sredstava tako da dio tih akciza pripada i općinama i rezultata toga jeste značajno povećanje pozicija kada su u pitanju prihodi od indirektnih poreza. Također, značajno je povećan prihod od davanja prava na eksploataciju prirodnih resursa. Znači da smo kroz davanje saglasnosti na gradnju mini hidroelektrana na rijeci Bosni tu saglasnost uslovili uplatom od 200.000,00 KM. U toj Odluci bio je uslov korištenja tih sredstava da investitor dobije od onih koji su nadležni za regulisanje koncesija odgovarajuće Odluke koje će omogućiti da dovede ovu investiciju u poziciju njene realizacije. Vlada Kantona Sarajevo je negdje prije mjesec i po dana utvrdila javni interes za ovo i time praktično omogućila daljnje radnje ovom investitoru što je na kraju krajeva omogućilo nama da tih 200.000,00 KM koji su uplaćeni prije možda dvije godine, postanu operativni i da ih možemo uključiti u ovaj Budžet.

Također imamo povećanje na poziciji primljeni kapitalni transferi od Kantona Sarajevo za nekih 646.000,000 KM. Vi ste vjerovatno prateći sve aktivnosti vidjeli da je općina Ilijaš potpisala određeni broj sporazuma sa resornim ministarstvima u Kantonu Sarajevo, a prije svega sa Ministarstvom komunalne privrede na iznos od 500.000,00 KM, sa Ministarstvom za prostorno uređenje vezano za izgradnju reciklažnog dvorišta i za daljnji nastavak revitalizacije Starog Grada Dubrovnika i da smo potpisali sa Ministarstvom privrede raspodjelu, odnosno sredstva vezano za uređenje vodotoka što rezultira povećanjem ove pozicije u ovom rebalansu. Nažalost, imamo i pozicija koje se smanjuju, pa se značajno smanjuju primljeni kapitalni transferi od nevladinih izvora za čak nekih 300 i nešto hiljada, a najveća stavka zbog koje se smanjuje jeste da nije došlo ili još uvijek je neizvjesna realizacija projekta izgradnje terena na gradskom stadionu koji je trebao biti finansiran od strane UEFA sa 250.000,00 KM, odnosno Nogometnog saveza BiH preko UEFA. Oni su se opredjelili za Goražde, a realizacija projekta u Goraždu još uvijek ne ide i da li će doći do promjene te odluke ne znamo. Mi smo bili, sa aspekta ispunjavanja uslova, na prvom

mjestu. Ako se Odluka i promjeni, realizacija neće moći biti u ovoj godini.

Povećali smo i prihode po osnovu primitika od prodaje zemljišta. Evo imamo i danas na dnevnom redu takvu jednu Odluku i značajno su se smanjila ova prenesena sredstva iz prošle godine što znači da mi ta sredstva koristimo, da se projekti implementiraju i time smanjuje nivo sredstava koja su tretirana kao prenesena sredstva.

Iz takve promjene strukture, imamo rebalansirani Budžet od 17.733.000,00 KM.

Kada su u pitanju rashodi, nivo sredstava za bruto plaće i naknade ostaju isti, izdaci za materijal i usluge koje su planirani u iznosu od 1.132.000,00 KM povećani su za 56.000,00 KM i uglavom to povećanje je proisteklo iz ove Odluke vezano za finansiranje rada Savjeta mjesnih zajednica i dijelom povećanje za poziciju volontera. Tekući transferi i tekući grantovi u osnovnom Budžetu su bili 2.414.000,00 KM, a sada su 2.532.000,00 KM. Dakle, povećanje cca 114.000,00 KM, a povećanje se odnosi na povećanje pozicije prevoza učenika za 60.000,00 KM. Provedeni tender je pokazao porast i zbog cijena i dijelom i zbog povećanja obuhvata. Dakle, umjesto 240.000,00 KM, sada je 300.000,00 KM. Imamo i ovu poziciju UNDP-a, transfer za UNDP nekih 60.000,00 KM, odnosno uvedena je stavka, a ona se odnosi na zajedničko sufinansiranje projekata utopljanja koje vodi Ministarstvo protornog uređenja Kantona Sarajevo i općina Ilijaš.

Na kraju, ostale pozicije se kreću na nivou osnovnog plana. Kada su u pitanju kapitalni transferi povećani su za 21.000,00 KM i oni su 6.927.000,00 KM, a kapitalni izdaci su 4.784.000,00 KM i oni su smanjeni za 178.000,00 KM.

U najkraćem, to je ono što je kroz ovaj rebalans tretirano.

Diskutanata po ovoj tački dnevnog reda više nije bilo, pa je Općinsko vijeće jednoglasno donijelo

Izmjene i dopune Budžeta općine Ilijaš za 2019. godinu

Uslijedila je pauza od 10:45-11:45h.

#### AD-5

Prijedlog Odluke o davanju mišljenja na Godišnji plan realizacije šumsko privredne osnove za privatne šume na području Općine Ilijaš

ALEN HASKOVIĆ – zamjenik predsjedavajućeg

U okviru ove tačke dnevnog razmatramo Godišnji plan realizacije šumsko privredne osnove za privatne šume na području Općine Ilijaš. Privatne šume, kao i državne šume, podliježu desetogodišnjim planovima, samo što njima upravlja i gazduje na određeni način Kantonalna uprava za šumarstvo. Dakle, ovdje se radi o davanju mišljenja na Plan realizacije te šumsko gospodarske osnove za privatne šume isto kao što se radi za državne šume. To je jedan desetogodišnji dio gdje je napravljen prikaz planiranih sječa po određenim kategorijama šuma. Građani na taj način ostvaruju svoja prava po pitanju prava na sječu u svojim privatnim šumama.

Diskutanata po ovoj tački dnevnog reda više nije bilo, pa je OV-e jednoglasno donijelo

Odluku o davanju mišljenja na Godišnji plan realizacije šumsko privredne osnove za privatne šume na području Općine Ilijaš

#### AD-6

Prijedlog Odluke o davanju saglasnosti na plan utroška namjenskih sredstava prikupljenih po osnovu naknade za korištenje državnih šuma

MERIMA OSMANOVIĆ – pomoćnica načelnika

Zakonom o šumama Kantona Sarajevo je propisano izdvajanje određenog procenta za općine. Znači u iznosu od 5% iz opšte korisne funkcije za zaštitu šuma. Trenutno je na snazi sporazum općinskog načelnika i JKP "Sarajevo-šume" za 2018. godinu i na bazi tih sporazuma JKP "Sarajevo-šume" svaki mjesec redovno uplaćuju tranšu na ime ovih sredstava tako da se u Budžetu općine Ilijaš prikupljaju sredstva iz ove namjene i ovom Odlukom se predlaže da se dio ovih sredstava usmjeri na finansiranje izgradnje vodovoda čija je gradnja u završnoj fazi obzirom da su ta sredstva namijenjena za infrastrukturu u oblasti gdje se nalaze šume.

Diskutanata po ovoj tački dnevnog reda više nije bilo, pa je OV-e jednoglasno donijelo

Odluku o davanju saglasnosti na plan utroška namjenskih sredstava prikupljenih po osnovu naknade za korištenje državnih šuma

#### AD-7

Prijedlog Odluke o pristupanju izradi plana parcelacije "Apartmansko naselje Alain" Ljubnići

MERSA ZEKOVIĆ – šef Odsjeka za prostorno planiranje i zaštitu okoliša

Firma "Alain" je vlasnik parcela površine 2,47 ha na lokalitetu Ljubnića. Tokom prošle godine, oni su ovoj Službi podnijeli zahtjev i pismo namjere za izgradnju naselja sa 23 objekta. To je lokalitet na potezu uz put prema mezarju u Ljubnićima, iznad mezarja, s desne strane. To je kontakt između tog puta i poteza mezarja. Znači, obuhvata tu površinu koja je neizgrađena. U prethodnom postupku pribavljena su stručna mišljenja nosioca izrade plana Zavoda za planiranje razvoja Kantona Sarajevo obzirom da se radi o lokalitetu koji je dijelom u obuhvatu urbanog područja, a dijelom u obuhvatu van urbanog područja u zonama označenim većim dijelom kao poljoprivredno zemljište, a manjim dijelom kao šuma i šumsko zemljište. Kako je pribavljeno mišljenje Zavoda uspostavljeni režim građenja je definisao da se za ovakve lokalitete i za područja na kojima se očekuje intenzivna izgradnja, a što smo mi smatrali da jeste obzirom da se radi o 23 objekta, postoji potreba izrade detaljnog plana. Pošto je vanurbano područje ne pristupa se izradi regulacionog plana, nego planu parcelacije kako je to sada definisano Odlukom o prostornom planu Kantona Sarajevo za naše područje. Pošto smo ispitivali opremljenost prostora infrastrukturom, pribavljena su mišljenja JKP "Vodostan", Elektrodistribucije koji su se izjasnili da ima uslova. Međutim, pošto se radi o zoni nadmorske visine preko 500 m, vodosnadbijevanje bi se riješilo izgradnjom potisnog cjevovoda sa pumpnom stanicom, a problem snadbijevanja elektroenergetskom mrežom bi bio riješen po izgradnji naselja u postupcima kako se radi za sva ostala područja. Plan parcelacije je jedan dokument kojim bi se obezbjedilo plansko uređenje ovog lokaliteta. Iz takvih razloga mi i zahtjevamo izradu dokumentacije kojom bi se definisalo šta može, kako može i pod kojim uslovima da se radi na određenim parcelama, a sve u cilju da se jedna bespravna izgradnja sankcioniše i da ne dozvolimo da ljudi na parcelama rade šta hoće, a bez preduslova kojima će se



obezbjediti infrastruktura i dat na upravljanje ovlaštenim preduzećima i biti od koristi za čitavu lokalnu zajednicu. Kako smo pribavili i mišljenje Ministarstva privrede Kantona Sarajevo i Ministarstva prostornog uređenja definisani su koraci i pristupa se, shodno odredbama Zakona o prostornom uređenju Kantona Sarajevo, izradi detaljnog planskog dokumenta koji je Plan parcelacije. Ovo je znači Odluka kojom se otvara mogućnost planiranja prostora na način da se vidi šta može, kako i koliko da se gradi. Nakon donošenja ove Odluke rade se geodetske i geološke podloge, utvrđuje se stabilnost terena, ispituje se mogućnost pristupa parcelama. Znači, planira se prostor na način da ne ugrozi lokalno stanovništvo, a da obezbijedi jedan urbani i planski razvoj na tim parcelama. Ispred Službe, predlažem vam da usvojite ovu Odluku, a u svim daljim raspravama, nakon usvajanja koncepta, Nacrta, biće Javna rasprava kako je i definisano ovom Odlukom u trajanju od petnaest dana gdje svi zainteresovani mogu dati svoje sugestije, prijedloge, primjedbe i sve što imaju, po čemu se naravno, kako je i definisano, postupa.

ALMIR ŠPIODIĆ – vijećnik BPS-Sefer Halilović

Vi ćete usvojiti ovu Odluku, kao i sve prethodne Regulacioni planove i Odluke vezane za apartmanska naselja, a naravno, bez mene, jer ja nisam glasao niti za jednu iz razloga što smatram da nismo to do kraja izdefinisali i nismo do kraja zaštitili naše građane, našu infrastrukturu. Vođen lošim iskustvom koja smo imali u proteklom periodu vezano za apartmansko naselje Sovrle gdje su počeli radovi na izgradnji jednog od apartmanskih naselja i treći dan kada je kiša pala, građani Sovrla su imali problem. Ovi što su se vraćali sa posla iz treće smjene, morali su ostaviti auta 200 m od svoje kuće i onda u čizmama preći preko blata koje je nanijelo to apartmansko naselje. Vidim da se i ovo apartmansko naselje, po mojoj procjeni, nalazi neposredno iznad mezarja. Mislim da ako se ne nađe pravo rješenje da se adekvatno zaštititi mezarje, vrlo lako može doći do poplava, klizišta, nanosa zemlje kada počnu kiše. Molim vas da obratite pažnju na to, jer znam da ćete usvojiti ovu Odluku. Spomenuli ste vodosnadbijevanje da će se raditi pumpna stanica, a mislim da se pumpna stanica već uradila u Radića potoku. Ne znam zašto još nije stavljena u funkciju, jer ja upravo imam pitanje za Vodostan od strane građana koji žive neposredno blizu mezarja gdje će se raditi parcelacija za ovo naselje i ljudi nemaju vode od 2010. godine kako su tu doselili. Dobili su vodnu saglasnost, urbanističku saglasnost, građevinsku dozvolu, uredno to sve platili, ali još uvijek ne mogu da se priključe na vodovodnu mrežu. To je jedan od razloga zašto ja neću glasati za apartmanska naselja, jer mi, čini mi se, za pare bi prodali "vjeru za večeru". Kada su u pitanju Arapi i kada dobro plate, onda se za njih može praviti naknade pumpne stanice, naknadni putevi, mogu uništavati šumu, mogu uraditi sve, a kada su u pitanju naši građani, oni ne mogu ništa zato što nisu u situaciji da plate, zato što nemaju naftnu bušotinu u svojoj avliji. Opet kažem, trebate obratiti pažnju vezano za zaštitu našeg mezarja koje se nalazi ispod ove parcele, da ne dođe do klizišta, da ne budemo imali slučaj ili grupu, kao što smo imali na Sovrlama, da ljudi ne mogu pristupiti svojim kućama jer im se nanese nanosi blata i zemlje od pola metra.

ELDAR ŠEHIĆ – vijećnik SDP-a

Samo da se nadovežem na kolegu Špiodića. Ja sam imao već dva-tri pitanja vezano za apartmatnsko naselje u Mrakovu i to je ono što nama najviše smeta kod ovih apartmanskih naselja. Mi smo svjesni situacije da ti Arapi koji dolaze možda podižu neki standard, donose pare koje se troše u Ilijašu i mi se svi slažemo i svjesni smo toga. Ali, isto tako, ako

će prilikom izgradnje ovog apartmanskog naselja oštetiti puteve i sve slično što se dešava trenutno u mom komšiluku gdje opština kaže da ne zna ko je nadležan ili samo da neko treba da izvede radove. Ja mislim da se trebalo u Odluci definisati ko će, kako i gdje refundirati troškove građana, jer svjesni smo toga da sav materijal koji ode za ovo apartmansko naselje će otići kroz Ljubnice, kroz naseljeno područje gdje će se vjerovatno uništiti putevi i sve slično ono što su gradili građani naselja i možda učestvovali u sufinansiranju.

MERSA ZEKOVIĆ - šef Odsjeka za prostorno planiranje i zaštitu okoliša

Želim odgovoriti na par primjedbi. Ovdje se radi o privatnom zemljištu, a kupoprodaja se radi bez mogućnosti da mi utičemo na takve stvari. To je privatno vlasništvo, firma je kupila i to je gotova stvar. Znači, mi kao Služba, nismo u mogućnosti da utičemo na takve stvari. Država je uredila sistem. Postoji zakonodavna vlast koja bi možda te neke stvari trebalo da rješava na većim nivoima. Mi, kao Služba, možemo pokušati urediti prostor i ovo je jedan od puteva. Što se tiče te bespravne izgradnje, Zakon je propisao ko treba da reaguje kod bespravne gradnje. Mi imamo inspektore i oni su ti koji treba da reaguju prije nego što se te stvari dese. Zakon je sve definisao, samo treba animirati, tj. inspektor treba da reaguje i da ne dozvoli bespravnu izgradnju na terenu. Što se tiče infrastrukture, uređenja, mi to ne možemo kroz Odluku o pristupanju izradi niti usvajanju. U Zakonu je rečeno, onaj koji ima interes da gradi, on može finansirati svojim sredstvima izradu planskog dokumenta što je slučaj i ovdje i svojim sredstvima finansirat će i uređenje. Znači, mi kroz Ugovor, a evo sada se radi za Sovrle. Imaju tri apartmanska naselja koja su ranije usvojena. Oni svojim sredstvima finansiraju uređenje lokaliteta i oni Ugovor potpisuju sa opštinom gdje se tačno definišu svi ti koraci. Oni su finansijeri i oni su dužni da uredi sve. Što se tiče vodopriopijevanja, gdje će se graditi pumpna stanica, hoće li se graditi, je li dovoljna postojeća, zato se Plan i radi. Da se sve preispita, da li ima dovoljno kapaciteta, da li je profil cijevi zadovoljavajući, ako nije, gradit će se još jedna, ako jeste možda treba povećati kapacitet te pumpne stanice i zato se Plan i radi da niko ne bi napamet pretpostavljao, a naravno uz saglasnost komunalnih preduzeća.

MUHAMED HANDŽIĆ – vijećnik BPS-Sefer Halilović

Ja imam jednu konstataciju vezano za izlaganje kolegice. Dobro ste rekli da mi imamo inspektore, ali "da ih imamo". Znači, pitanje je da li ih imamo? Činjenica je da ta inspekcijaska služba kod nas ne funkcioniše, a u vijećničkim pitanjima i inicijativama ću obrazložiti zašto. Da funkcioniše, ne bi se desilo ovo što se desilo na Sovrlama, ne bi Almir i kolega iz SDP-a sada postavljali pitanja. Na žalost ne funkcioniše, kod nas inspektorat radi po direktivama. To je činjenica, jer sam bio prisutan jednom sramotnom činu našeg inspektora na Banovcu gdje se nane okupljaju i piju kafu pod jednom brezom gdje je on došao da naredi da sklone klupe, stolice, a samo iza njegovih leđa 20 m nalazi se privatni objekat "Mistik" koji je uradio armiranu, betonsku baštu, koji je dobio bespravnu vodu u tu baštu, bespravnu struju u tu baštu i niz drugih nepravilnosti. On se tu ne smije obratiti. Znači ne smije zbog direktiva. To je činjenica i mi se s tim moramo složiti ovdje. Dokle god se nešto ne promjeni drastično u sistemu vlasti, dokle god to mi ne promijenimo, a vjerujte da narod šuti, a kad šuti to nije dobro, desiće se nešto sigurno, vjerujte. Inspektori, najžalosnije je što su oni dobili posao na takav način, mnogi od njih, putem tih privatnih veza, a nisu putem sistema i putem svojih školskih sprema za koje bi trebalo da odgovaraju.

Diskutanata po ovoj tački dnevnog reda više nije bilo, pa je OV-e većinom glasova usvojili

Odluku o pristupanju izradi plana parcelacije "Apartmansko naselje Alain" Ljubnići

AD-8

Prijedlog Odluke o davanju saglasnosti za raskid ugovora

Diskutanata po ovoj tački dnevnog reda nije bilo, pa je OV-e jednoglasno donijelo

Odluku o davanju saglasnosti za raskid ugovora

AD-9

Prijedlog Odluke o načinu i uslovima prodaje neizgrađenog građevinskog zemljišta  
(k.č.br.1039/3)

Diskutanata po ovoj tački dnevnog reda nije bilo, pa je OV-e jednoglasno donijelo

Odluku o načinu i uslovima prodaje neizgrađenog građevinskog zemljišta (k.č.br.1039/3)

AD-10

Prijedlog Rješenja iz imovinsko-pravne oblasti, broj: 06/1-31-3734/18  
od 26.06.2019. godine

Diskutanata po ovoj tački dnevnog reda nije bilo, pa je OV-e jednoglasno donijelo

Rješenje iz imovinsko-pravne oblasti, broj: 06/1-31-3734/18 od 26.06.2019. godine

AD-11

Informacija o stanju sigurnosti na području Općine Ilijaš za proteklih šest mjeseci 2019.  
godine

Diskutanata po ovoj tački dnevnog reda nije bilo, pa je OV-e primilo k znanju

Informaciju o stanju sigurnosti na području Općine Ilijaš  
za proteklih šest mjeseci 2019. godine

AD-12

Vijećnička pitanja i inicijative

ANEL BUMBULOVIĆ – vijećnik SDA

Inicijative:

1. U ime građana MZ Misoča-ulica Han, pokrećem inicijativu da se postave ležeći policajci u ulici i to visine 30 cm. Svaku noć u periodu od 18:00-23:00 h i duže imamo problem sa četverotočkašima, motorima i automobilima. Naime, održavaju se trke kroz selo i pored opominjanja i prijava policiji to se u kontinuitetu nastavlja, a naselje je puno male djece i sve kuće tj. dvorišta izlaze na put.  
Prilog: potpisi 30 građana

2. S obzirom da su provedeni izbori u Mjesnim zajednicama na području općine Ilijaš, tražimo od nadležne službe da za narednu sjednicu Općinskog vijeća Ilijaš pripremi Informaciju o poduzetim aktivnostima i primopredaji u mjesnim zajednicama.

Na sjednici OV-a smo imali svečanu primopredaju dužnosti, ali nas nadležna općinska služba nije informisala o zatečenom stanju. Naime, na sjednicama Kolegija OV-a mi smo zaprimili određene informacije koje smo prosljedili nadležnoj općinskoj službi na analizu i dalje djelovanje, ali nismo dobili nikakvu povratnu informaciju. Stoga tražimo da se te Informacije dostave OV-u.

Sljedeću inicijativu bih zamolio da usvojimo kao Zaključak.

3. Pokrećem inicijativu da se organizuje hitan sastanak sa predstavnicima Željeznica Federacije BiH, općinskim načelnikom, predstavnicima Općinskog vijeća Ilijaš i predstavnicima MZ Podlugovi. Takođe, na sastanku bi trebalo ili pod obavezno da prisustvuje i šef ili rukovodilac Željezničke stanice Podlugovi.

Obrazloženje: Evidentno je da se građani općine Ilijaša, a naročito MZ Podlugovi svakodnevno već duži period susreću sa mnogobrojnim problemima i neugodnostima koji su vezani za funkcionisanje i rad željezničkog saobraćaja. Najveći problemi vezani su za pružne prelaze, odnosno neadekvatno funkcionisanje istih. Zatim, tu je održavanje, odnosno neodržavanje zemljišta koje je u vlasništvu Željeznica Federacije BiH, a predstavlja potencijalnu opasnost.

Više puta su se vijećnici obraćali Željeznicama Federacije BiH, ali nikada nismo dobili adekvatan i zadovoljavajući odgovor.

Pitanje:

Kada će biti izvršena sanacija stubova ulične rasvjete u ul.Žrtava genocida u Srebrenici?

Obrazloženje: Na jednoj od prethodnih sjednica sam pokrenuo inicijativu za sanaciju istih. Nadležna služba je izašla na teren, fotografisala i utvrdila da određeni broj stubova ne stoji u vertikalnom položaju, te da isti predstavljaju potencijalnu opasnost.

MUHAMED HANDŽIĆ – vijećnik BPS-Sefer Halilović

Inicijativa:

Molim načelnika općine da poduzme odgovarajuće mjere na obezbjeđenju pitke vode za područnu školu u Gornjoj Bioči.

Obrazloženje: Rezervoar iz koje se snabdijeva područna škola vodom za piće je u katastrofalnom stanju po pitanju čistoće vode, jer isti nije očišćen više od 10 godina, a kontrola ispravnosti vode također nije izvršena u tom periodu. S tim u vezi, molim Vas da nadležni urade što bi trebali da ne bi smo radi navedenog imali posljedice.

Predlažem da ova inicijativa bude Zaključak ovog Vijeća.

Pitanje:

Šta je nadležna općinska inspekcija uradila po pitanju spriječavanja deponovanja stajskog đubriva u rijeku Bosnu i Biočki potok iz stajnjaka koji gravitiraju uz sama korita rijeke Bosne i Biočkog potoka.

Obrazloženje: Ovo je peta sjednica Vijeća na kojoj postavljam isto pitanje, a dobivam jedan jako bezobrazan odgovor od komunalnog inspektora koji meni odgovara u tom smislu šta su njegove nadležnosti, a ja to uopšte nisam pitao. U nekom drugom odgovoru, odgovara mi kako je definisano držanje stoke, a takođe me to ne interesuje. Mi smo donijeli Odluku o držanju stoke, a Zakon naravno da postoji na nivou Kantona Sarajevo. Kao odgovor sam dobio još niz nebuloza. Ja to ne bih poslao nikome ko uopšte zna čitati. Ovo pitanje je možda i posljednje koje sam uputio Inspektoratu općine Ilijaš, dok ne pokrenem postupak, a postupak će glasiti: okupljanje građana tj. protesti, a možda i zatvaranje ulica, dok ne riješe ovo. Ja ću biti na čelu tihi protesta i to javno kažem, dok to ne spriječite. Radi se o tri farme: farma pilića u Bioči, farma pilića u Ribarićima i farma stoke u Kadarićima.

Evo pripremamo Regulacioni plan za Banovac i vidim da se težište fokusiralo na obuhvat oko rijeke Bosne, a nismo riješili ni ovu farmu koja je sa druge strane i zagađuje i od koje građani ne mogu da žive u Ilijašu od neugodnog mirisa.

ALMIR ŠPIODIĆ – vijećnik BPS-Sefer Halilović

Prvo ću se zahvaliti općinskim službama koje su mi dale korektne i konkretne odgovore koji su realno provodivi u praksi u vezi pokrenute inicijative i pokrenutih pitanja na prošloj sjednici. Drago mi je da je prihvaćena inicijativa za izgradnju podzemnog prolaza ispod pruge u Podlugovima za pješake. Iskreno se nadam da će i podjela PEHD kanti biti onako kako ste i naveli u odgovoru da se konačno i taj problem riješi, jer više nije problem samo građana Podlugova i njihov kućanski otpad koji odlažu u te kante. Problem je što se donosi otpad sa drugih mjesnih zajednica, pa čak i sa drugih opština i ljudi deponuju ostatke od stoke. Nailazili smo na kosti pored kontejnera koje ostavljaju mesari u Podlugovima. Ja evo imam i sliku toga. Pokretao sam jednu inicijativu za uklanjanje kontejnera ispred škole i tada mi je rečeno da će u 2019. godini biti podjela tih kanti. Međutim, još uvijek se to nije desilo i nadam se da će se do kraja 2019. godine i to realizovati onako kako ste i naveli u odgovoru.

Pitanja:

1. Na jednoj od prošlih sjednica sam pokretao inicijativu prema Elektro distribuciji Sarajevo da se poveća napon na elektrodistributivnoj mreži u naselju Vratuša i Doci. Nakon što ste vršili mjerenje napona 2h na mreži, dostavili ste mi odgovor da je potrebno postaviti trafo kako bi se povećao napon, ali niste naveli koliki je napon zabilježio aparat u toku mjerenja. Lično sam prije par dana zvao Elektro distribuciju i dolazili su ljudi koji su mjerili napon koji je 186 volti. Mi smo sa vama gospodo potpisali Ugovor koji ste vi pisali i u tom Ugovoru ste naveli da ćete isporučivati napon 220 volti. Mi smo uredno platili taj priključak i zašto ne poštujete taj Ugovor i ne ispoštujete građane onako kako ste i naveli u Ugovoru? Molim vas ubrzajte aktivnosti na rješavanju ovih problema, jer su građani na ivici strpljenja.
2. Kada će se riješiti problem kanalizacije i redovno vodosnadbijevanje pitkom vodom naselja gornji Kadarići?  
Obratila mi se grupa građana iz naselja Gornji Kadarići koji već duže vrijeme nemaju redovno vodosnadbijevanje, a imaju uredno postavljene satove i uredno se ispostavljaju računi za zrak koji prolazi cijevima umjesto vode. Pored problema sa vodom, Gornji Kadarići nemaju ni riješenu kanalizaciju. Govorim o Gornjim Kadarićima koji su sastavni dio Mjesne zajednice Ilijaš Grad što znači da je to prigradsko naselje udaljeno od ove zgrade 2 do 3 kilometra, a građani još nemaju riješenu osnovnu komunalnu infrastrukturu, a imaju uredno dobivene urbanističke i

građevinske dozvole i uredno je sve to plaćeno, ali zato nemaju obezbjeđene osnovne uslove za život, a to je voda i kanalizacija. Ovo je gospodo sramota sviju nas i onih prije nas koji su upravljali procesima u Ilijašu, a pogotovo onih koji su pred svake izbore dolazili i tražili glasove od građana, a kada dobiju mandat ogлуše se na njihove zahtjeve.

Molim nadležne općinske službe i JKP "Vodostan" da ubrzaju pronalaženje rješenja i ozbiljno pristupe rješavanju ovih problema za građane Kadarića.

U Ljubničima takođe građani imaju iste ili još gore probleme gdje ne mogu da dobiju priključak na gradski vodovod, ali za to Arapska naselja mogu da se priključuju i zbog njih se rade pumpne stanice da bi im se udovoljilo. Iako građani imaju uredno dobivene urbanističke i uređeno plaćene građevinske dozvole ipak ne mogu da se priključe na gradski vodovod, pored dobivene načelne saglasnosti da postoji mogućnost priključka na gradski vodovod. Pismeno su su obraćali JKP "Vodostan" i općini i usmeno dobijali odgovore od strane menadžmenta JKP "Vodostan": "Ko vam je kriv što ste pravili kuće na brdu" i "Pitajte Arape da se priključite na njihov vodovod" itd.

3. Kako je moguće da se izda urbanistička i građevinska dozvola od opštine, direktor/ca JKP "Vodostan" izda načelnu saglasnost i napravi predračun, a onda kažete građanima da se ne mogu priključiti na gradski vodovod? Odgovor Vodostana na ove probleme građana je da se radio pumpno postrojenje u Radića potoku koje nije završeno i sa kojeg će se omogućiti priključak Gornjih Kadarića i Ljubnića na gradski vodovod.
4. Dokle je došla realizacija projekta izgradnje pumpnog postrojenja u Radića potoku i kada se se staviti u funkciju?

ŠEHERZADA ĆOSIĆ – vijećnica SDA

Inicijative:

1. Pokrećem inicijativu prema JP Željeznice Federacije BiH da se u Ilijašu uspostavi vozno stajalište za vozove putničkog saobraćaja.

Obrazloženje: Već duže vrijeme građani ukazuju na potrebu voznog stajališta u Ilijašu. Isti koriste uslugu voznog putničkog saobraćaja, a do prvog stajališta u Starom Ilijašu ili Podlugovima su udaljeni i do 2 km. Tako da bi se ovim znatno poboljšao kvalitet usluge putničkog saobraćaja JP Željeznice Federacije BiH za građane Općine Ilijaš i vjerovatno povećao broj korisnika ovog prevoza.

2. Pokrećem inicijativu prema JP Željeznice Federacije BiH da se uredi pružni prijelaz u Starom Ilijašu od željezničke stanice do mosta na rijeci Misoči.

Obrazloženje: U navedenom dijelu neophodno je urediti navedeno zbog svakodnevnog frekvencije velikog broja građana i blizine osnovne škole.

Pitanje:

Predmet "Oštra krivina" u naselju Mrakovo, kandidovan je od strane Savjeta MZ Mrakovo prije devet godina. Više puta smo putem pitanja i inicijativa podsjećali na realizaciju iste. Općinsko vijeće je predmet proglasilo javnim interesom, projektna dokumentacija postoji, izvođač radova čeka nalog. Nema smetnji da se ovaj predmet pozitivno riješi,

a svakodnevno na ovoj krivini imamo opasnost i rizike za naše građane.

Koliko treba da se donese Odluka po žalbi drugostepenog organa? Postoji li mogućnost što skorijeg rješenja, obzirom da je rizik kojem su svakodnevno svi građani izloženi zaista velik.

ELDAR ŠEHIĆ – vijećnik SDP-a

Nadovezat ću se na Šeherzadinu inicijativu. Voz svakako stoji na Alića rapmi, pa treba samo da otvori vrata i možda da putnici uđu ili izađu.

Inicijativa:

1. Pokrećem inicijativu da se sruši rampa, odnosno signalizacija na Alića rapmi.

Obrazloženje: Svjedoci smo nefunkcionalnosti iste signalizacije i neprestanog negodovanja građana Ilijaša. Signalizacija radi sedam dana, pa ne radi sedam dana. I kada radi stvara probleme. Ja ovom prilikom želim da čestitam ovom expertu koji je isti prijelaz projektovao. Nemoguće je napravio. Očigledno je postalom da trebamo ovakvu inicijativu uputiti, pa da vi skontate da imamo problem na pomenutom prelazu.

2. Pokrećem inicijativu da se na nekoj od narednih sjednica Općinskog vijeća uvrsti tačka dnevnog reda Manifestacija "Čevljanska korida".

Obrazloženje: Svjedoci smo nedavnog dešavanja na Čevljanskom polju, na našoj tradicionalnoj manifestaciji kojom se kao Općina ponosimo. Također smo svjedoci da iz godine u godinu ta manifestacija uzrokuje sve više problema kako u samoj organizaciji tako i na sam dan koride. Mislim da bi mi, kao Vijeće, koje je zaduženo da prati rad mjesnih zajednica i kao Vijeće koje je tu prvenstveno da donosi Odluke i raspravlja o svim problemima vezanim za naše stanovništvo u cilju rješavanja istih, trebali da sebi postavimo ovo pitanje i da ga probamo bar djelimično riješiti.

Nije mi jasno zašto niko ne postavi pitanja kao što su:

- stvarna dešavanja koja su tradicionalna;
- zadovoljstvo Mjesne zajednice i njenih stanovnika;
- Mjesna zajednica gubi ili dobija;
- Koliko Mjesna zajednica profitira;
- Stvarni broj prisutnih gostiju;
- Sigurnosna situacija;
- Da li je sve po zakon i u kojem procentu je sve to legalno;
- Zašto mi kao Vijeće, nemamo Izvještaj ili Informaciju sa iste manifestacije;

ili ako je već to pitanje koje ne smije ovdje da se postavi, ako je to neka javna tajna, ako je to nešto u što mi ne bi trebali ulaziti i postavljati pitanja, zašto se onda jednostavno Općina ne ogradi od iste manifestacije sa nekim saopštenjem za javnost. Dok po Ilijašu kruže priče da su predate neke tužbe, dok kruže priče da se predaju krivične prijave mi samo ovdje sjedimo i glumimo kao da ne znamo ništa od toga.

Ja sam osoba koja će se osjećati odgovornom za cijelu ovu situaciju ako ovo ne pitam, ja ne želim da mi neko sutra kaže kako su se na mojoj Općini desile neke stvari koje niko nije smio da pita, nije pokušao da nešto promjeni i mislim da vi kao moje kolege sa kojima zajedno ovdje sjedim i dijelim istu ovu prostoriju se osjećate isto.

Želio bih da mi se odgovori na ova pitanja.

Pitanje:

Postavljam pitanje vezano za naše glavno šetalište u Ilijašu, a odnosi se na nedavno čišćenje ulice koje je finansirala Općina Ilijaš.

Da li, i ako jeste, ko je vršio nadzor radova čišćenja ulice? Je li dogovoreno čišćenje cijele ulice i ako jeste zašto nije odrađeno?

RASIM ŠEHIĆ – vijećnik SDA

Inicijativa:

Pokrećem inicijativu prema Elektroprivredi za instalaciju trafostanice u MZ Kamenica (zaseok Nanići).

Poštovani/a, ovim putem vam se obraćam sa inicijativom za instalaciju trafoa u zaseoku Nanići – MZ Kamenica. Naime, postojeći trafo udaljen je 1,5 km od ovog zaseoka, isti je slabijeg kapaciteta i postavljen je 1996. godine kao privremeno rješenje. Instalacija trafoa jačeg kapaciteta nikad nije dovršena, te zbog toga stanovnici gore navedenog zaseoka nisu adekvatno snabdjeveni električnom energijom, jer prilikom manjih opterećenja osjeti se pad napona. Obzirom da sam i ranije upućivo ovakvu inicijativu, a dobio sam odgovor da postoji problem sa imovinsko-pravnim odnosima, ovim putem vas obavještavam da su isti riješeni i po tom pitanju Savjet MZ Kamenica vam stoji na raspolaganju kako bi pozitivno riješili ovaj problem.

ALMA OMEROVIĆ – predsjedavajuća

Kolega Anel Bumbulović i Muhamed Handžić su tražili da se o njihovim inicijativama izjasnimo u vidu Zaključka. Mislim da inicijativa Muhameda Handžića iziskuje dodatna finansijska sredstva.

MUHAMED HANDŽIĆ – vijećnik BPS-Sefer Halilović

Zaključak ne iziskuje dodatna finansijska sredstva, jer mi smo osnivači JKP "Vodostan" Ilijaš, to je naša firma i načelnik ima puno pravo na naredi-naloži ovoj firmi da izvrše sanaciju oko i u pomenutom vodovodnom bazenu u Bioči. Ovo sam pitanje pokretao nekoliko puta i od toga nije bilo ništa. Djeca u ponedjeljak kreću u školu i kada se desi epidamija onda se hvatamo za glavu i onda ćemo izmišljati "desilo se zbog nečega", a nije zbog vode. Ovdje je isključivo odgovornost na nama i molim vas da Zaključak bude da općinski načelnik naloži JKP "Vodostan" Ilijaš da izvrši čišćenje i hlorisanje vode u bazenu Bioča. Ovo je najviše radi učenika koji polaze u školu u ponedjeljak. Ovo se isto tiče i pomoćnika načelnika opću upravu i lokalnu samoupravu. Ovo je hitno i to treba odmah riješiti.

ALMA OMEROVIĆ – predsjedavajuća

Zamolit ću kolegu Anela Bumbulovića da pročita svoj prijedlog Zaključka.

ANEL BUMBULOVIĆ – vijećnik SDA

Prijedlog Zaključka: Zadužuje se općinski načelnik da organizuje hitan sastanak sa predstavnicima Željeznica Federacije BiH, predstavnicima Općinskog vijeća Ilijaš i predstavnicima MZ Podlugovi. Takođe, na sastanku bi trebalo ili pod obavezno da



prisustvuje i šef ili rukovodilac Željezničke stanice Podlugovi.

Općinsko vijeće je jednoglasno usvojilo

#### ZAKLJUČAK

Zadužuje se općinski načelnik da organizuje hitan sastanak sa predstavnicima Željeznica Federacije BiH, predstavnicima Općinskog vijeća Ilijaš, predstavnicima MZ Podlugovi, kao i šefom ili rukovodiocem Željezničke stanice Podlugovi.

MUHAMED HANDŽIĆ – vijećnik BPS-Sefer Halilović

Prijedlog Zaključka: Zadužuje se općinski načelnik da izda nalog JKP "Vodostan" Ilijaš da izvrši čišćenje i dezinfekciju lokalnog bazena pitke vode koji snadbijeva Područnu školu u Gornjoj Bioči.

Općinsko vijeće je jednoglasno usvojilo

#### ZAKLJUČAK

Zadužuje se općinski načelnik da izda nalog JKP "Vodostan" Ilijaš da izvrši čišćenje i dezinfekciju lokalnog bazena pitke vode koji snadbijeva Područnu školu u Gornjoj Bioči.

Nakon što je iscrpljen dnevni red, predsjedavajuća Alma Omerović zaključila je tridesettreću sjednicu OV-a Ilijaš u 12:30 h.

Zapisničar:  
Maida Habibović

PREDSJEDAVAJUĆA  
OPĆINSKOG VIJEĆA ILIJAŠ

---

Alma Omerović, BA nov.